


# SCHNAPPLÜFTLI

E Infobledli fir unseri Gönner

Uusgoob 2/05



- Faasnachts-Rüggbligg
- Info Erlefescht
- Guetschyyn



Erschynigswyys: 2 x pro Joor

Uflaag: 150 Exemplaar

Drugg: Xerox Docu Color  
Marcel Portmann

Gstaltig und  
Redaggtion Roger Müller

Adrässe: Roger Müller  
Römerstroos 32  
4153 Ryynach

oder clauaro@freemails.ch

Helge uf dr Titelsytte:  
E Usschnitt vom Plakättli vom Kinder-  
Charivari 2005  
„d Zauberschleegel“

**S Wätter an dr Faasnacht isch immer e zentraals Thema. Isch jo logisch, do me sich halt mee oder weniger dusse uf dr Gass ufhalte will. Dasmol isch bitter kalt gsii und so simmer au öbbe emol mee neume dinne ghöglet. Aber bligge mr emol e bitzeli mee zrugge:**

Schnee am Morgestraich isch sozaage Schnee vo geschter. Altdienti Faasnächtler hänn die drey scheenschte Dääg scho in alle Facette erläbt. Wie isches doch im Meerz 1981 gsii, wo am Morgestraich 11 Grad (plus!) gsii isch. S Thermometer isch denn tagsyber uf mee als 20 Grad gstiige (nit nur am Mändig, sondern au die zwai folgende Dääg.

Wär sich am Mändig, 14.2.05 denn ein abfroore het, ka sich dröschte, dass die Summerfaasnacht 1981 au ihri Tügge kaa het. Me het nämmlig fyrchterlig gschwitzt in de Goschdym. 1998 denn hets wärmetechnisch no ein druf gää: 23 Grad am Mittwoch-nommidaag. Oh jee, dr Wysswy uf unserem Requisit het nümme gschmeggt .... Und dr Wätterstatistiker Pilatus (het damals no gläbt), het vo dr wermeschte Faasnacht aller Zyte gredet.

2001 het me dr bekannti Spruch «dr Petrus isch e Basler» laufend widerholt. D Prognose hänn s Schlirmschte vorusgsait, dr Ladärnesunnig hets verrägnat und vo die Aggtive und d Zueschauer an Morgestraich gange sinn immer no. Fünf Minute vor 4i hänn sich aber d Wolgge verzooge ....

Wättermässig isch d Faasnacht 05 alles andere als super gsii. Sicher kalt, aber

abgsee vo däm Schnee(stürmli) am Mändignommidaag, ainigermasse OK. Wie yberhaupt, het dr Basler insgesamt sicher viil, viil mee Faasnachts-dääg erläbt, wo s trogge gsii isch und das isch s Wichtigschte. Wenn me nämmlig die scheene Goschdym und d Larve mit dene hässlige Plastiksegg muess abdegge, isches aifach fruschterierend. 1999 zum Byschpiil, denn isch nämmlig drey Dääg Schywwätter gsii.

Do no e letschti Mändigserinnerig: 1956 (bin ich wissentlig noni uf dr Wält gsii, ha das aber nocheglääse) het me am Morgestraich 17 Grad Minus gmässe! Die zwei folgende Dääg isch s Thermometer denn nit anöchernd an d Nullgradgränze gstiige - brrrr ..... Und nit nur das: am Samschtig vor em Morgestraich hets am Nodlebärg e Grossbrand gää. S Löschwasser vo dr Ffürwee isch am Spaalebärg aabegloffe, und wenn me vom Märplatz zur Lyss het welle (oder widder zrugge) het me miesse ufasse, dass me uf dr digge Yysschicht kai Seppi grisse het.

Die näggscht Faasnacht isch denn am 6. Meerz 2006. Das lot uf aagnäämeri Temperature hoffe ...

Roger



D Faasnacht 2005 hänn  
d Luftschnapperli mit folgendem  
Süschée duurezooge: „Stadt  
und Land miesste sich  
schämme, esoo finde die zwai  
wirgglig nie zämme!“.

Dr Obmaa (Süschée-Chef 2005) und  
dr Plyfferchef.  
Wo het au dr Mull si „Händli“???  
Glaub das rote (schwuule?)  
Goschdym het „abgfärbt“!



Farbig dängge: E Draum in Schwarz-Wyss und Rot-Wyss!  
Dasmol isch ändligg e langerseente Wunsch vo vylne  
Luftschnapperli (aigentlig vo de Fraue ....) in Erfyllig gange:  
E bequeems und scheens Goschdym! Roti und schwarz!  
Dummpeter demonschtrierte gege d Regierige BS/BL (dargestellt  
vom Major als Esel in Schaaale).



... total happy  
in däm tolle  
Goschdym ...



9 Plyffer, 5  
Vordrääbler und  
1 Major.





„D Pramuttzer-Gaischtli“.  
E 3-er Faasnachts-  
gruppiert us Muttentz.  
Bsunderi Merkmoool:  
No nie e Laarve aa kaa,  
drfyr top frisiert und e huffe  
Bätsch am Goschdym. ☺  
Vo links nach rächts:.  
Esthi (Haase), Katja  
und d „Trutsch“.

Die stadtbekannte „Golden-Girls“. Das  
Joor sogar mit eigenem „Zinn“-Bächer!  
Vo links: Heidi, Lotti, Lisbeth.



Nei, glaub die zwai sinn  
nit „zämme“; hänn  
aifach luschtig  
mitenand. ☺  
Dä rächts isch dr  
Thommi Aebi und dä  
links .... ääh...e glatte  
Siech.



S Requist 2005: „Hau-Rugg, Hau-Rugg, fescht heebe mit dr Hand, s Sailzieh zwische Stadt und Land.“





d Luftschnapperli



Faasnacht 2005

«Stadt und Land miesste sich schämme,  
ammel esoo, finde die joo wirggig nie zämme»

Baidi heebe s Aendstigg vom Band fescht in dr Hand,  
bym grosse Sailzieh zwische Stadt und Land.

Au wenn jo eigendlig klaar abgsteggt sinn die Gränze,  
zer Marschiebig goot me aber uff s Land go schränze.

Im Geegezug ... die Rammle - und mir findes e Hit -  
laufe d Faasnacht in dr Stadt am Cortège mit.

Ob Stetter oder Landai isch doch ainerlai,  
Faggt isch ... mir alli sinn in dr Regio Basel dehai.

Vo Ammel bis Glayhüünige, vo Sissach bis an Ryy,  
baidi Basel sotte doch in Zuekunft zämme syy.

Unterschiid gitts zwar scho no und mir soages diräggt,  
d Landschäftler miesste no schaffe an iirem Dialägg.

S Land het dr Rotscher ... mir hänn unsere FCB doo,  
s näamt ys wunder, wär uns doo no wett-schloo?

Fir alli ai Baslerzyttig giengt kimftig in Drugg,  
als Stetter go schyyffaare im eigene Langebrugg.

D Regierige miesste langsam die Hintere fiire nää,  
verhandle isch guet, aber me muess halt ammel au gää.

Das abwääge und märtle isch doch eigendlig e Hoon,  
mir sinn doch zämme ai grosse und stolzze Kanton.

Zämme lääbe und Faasnacht mache, sich zämme finde,  
drumm dien d Luftschnapperli jetzt baidi Basel verbinde.

Oobe links: Am  
Mändig bim  
Nachtässe in dr  
Urbanstuube.

Oobe rächts: im  
Bebbi-Käller am  
Uffwerme.

Dr Zeedel 2005:  
Autor: dr Marco mit e  
paar Inputs vom  
Ruedi Zurfluh, wo  
die eigentligg Idee  
zem Süschéé ka het.  
Unsere Obmaa, dr  
Marco het mit dr  
bildig vonnere SFK  
(Süschéé-Findigs-  
Kommission) fir  
ernool ebbis  
bsunders ussdänggt.  
Mitglieder vo dr SFK  
sinn näbscht em  
Marco dr Däni Müller  
und wie erwäänt dr  
Ruedi gsii.

# Faasnacht als Waggis. Eso hets usgsee vor vylne Joor:

Links vo oobe: Waggis-Cligue Klybeck  
(1930), Hahne-Moos Cligue (1948) und  
d Atom-Waggis (1961).

Rächts vo oobe: D Riechemer Duubel  
(1930), dr Gränzgänger-Club (1957)  
und d Schigge-Jütter (1962)



488



490



491

D Zyt raast vorbyy. Es isch  
doch gar noonig soo lang här  
und die „Junge“ vo de  
Luftschnapperli hänn eso  
usgsee ....

PS: In dr näggschte Usgoob  
vom Schnapplüftli zeige mr  
denn no die andere „Binggis“:  
dr Luca, dr Yannik, dr Michele  
d Caroline, dr Karim, dr Sandro,  
dr Severin, d Sofie, d Julia, d  
Samira und dr Yves.

Rächts: d Claudia Annen mit  
dr Jasmin. Unde links dr Cyrill  
Müller und unde rächts dr  
Dominic (ex „Bigger“) Stämpfli.





Oobe links, die beide Schmid  
vo Losann: Cindy und Melanie

Oobe rächts, die beide Zurfluh:  
Sarina und dr Nicola.

Rächts unde: die beide  
Eigenmann, Selina und  
Jessine.





**Scho zem zwaite Mool kunnt an  
dääre Stell e Mitgליד vo de  
Originaal «Goldengirls» doo z  
Wort. Sii het au fir d  
Luftschnapperli e wichtige Dayl  
byydrayt ... isch sii doch .....  
s Mami vo unserem Obmaa.**

Name	Lisbeth Bächmann
Alter	68
Zivilstand	syt 6 Joor verwitwet
Kinder	2 «Buebe», dr Stefan und dr Marco
Bruef	Räntnerin

**Wie würd e Wärbeslogan iber di lute?**  
«Wichtig isch ... immer vorwärts luege!»

**Was würdisch an dim Uusgsee ändere?**  
Doo isch (glaub) Hopfe und Malz verloore.

**3 positivi Aigeschafte vo dir?**  
Frööligh, Gselligh und Eerligh.

**Was sinn dini Hobbys?**  
Wandere und Ferie in Kreta.

**Was hesch welle wärde, wo de ebbe 10  
gsi bisch?**  
Säuglingskranggeschwöschter.

**Mit was hesch als Kind am liebschte  
gspiilt?**  
Mit de scheenschte Buebe im Quartier.

**Hesch e Laschter? Und welles?**  
Mit dr Heidi in dr Baiz (iber-) höggli.

**Was kritisiersch an dir sälber?**  
Mänggmool han ych zweenig Geduld.

**Was wär di Traum vom Abentüür?**  
Nach Kreta, zue de scheene Grieche,  
usswandere.

**Was issisch, dringgsch am liebschte?**  
Cordon Bleu und Wyssse, aber nid  
unbedingdt zämme.

**Was loosisch gärn fir Musig?**  
Dr Hansi Hinterseer und Westlife.

**Läasisch grad e Buech, und um was  
goots?**



«Der Mann mit dem Fagott» vom Udo  
Jürgens.

**Du dörfstisch e neys Gsetz kreiere –  
welles wär das?**  
Gnueg Gäld fir alli.

**Iber was fir Glaynigkaite kasch di ergere?**  
Iber Natel im Drämmli.

**In was wärsch gärn e Superstar?**  
Im Koche.

**Welli 3 Sache würdsch uff e ainsaami  
Insle mitnäã?**  
Hmmm ... e Radio, s Natel und ... dr Erol  
Sander.

**Wenn dr Arzt würd saage, du hesch nur  
no 24 Stund z lääbe, was machsch?**  
Dängge «ych ha e scheen Lääbe kaa».


**E gueti Fee schänggt dir spontaan  
Fr. 25'000.- zum «verputze». Was  
machsch drmit?**  
Richtig scheen uff Griecheland und dr  
Räschte mit mine Kinder verbutze.

**Wo usser dr Schwyz, kennscht dr au no  
vorstelle z lääbe?**  
Ebbe ... in Griecheland, uff Kreta!

**Liebi isch ...?**  
44 Joor ganz e liebe Maa, zwai «prächtig»  
Söön wo Super zue mir luege und denn  
nadyrrlig dr Luca ... mi Goldschatz!

**3 spontaani Gedangge zer Faasnacht?**  
D Luftschnapperli, d Stainlemer und «mini»  
Goldengirls.

## E paar Impressione us em alte Basel.



Bau vo dr hüttige Mittlere Brugg. Im Vordergrund das äxtra als „Notbrugg“ errichtete Provisorium. S het vorhär scho e Brugg gä us Holz; die isch ca. 1225 baut worde. Syt 1478 gits s Käppelijoch-Kapälleli us Stai. Vo dört us het me friener Todesurteil durch Ertränke vollstreggt. Vorallem Fraue, wo Kindsmord begange hänn oder Ehebruch ....



Oobe: Bligg vom Claraplatz in d Gryffegass.  
Unde: vom Claraplatz Richtig Clarastroos.  
Um 1900.



Dr Barli um 1906. Uf däm Platz hänn sich friener d Säu tummlet (Seibi = Schweinemarkt).

Das hälle, grosse Gebäude im Hintergrund links (bild unde) stoo hyt no. Zu dere Zyt isches no s Hotel Metropol gsii. Die beide mittelalterlige Hüüser in dr Bildmitti (mit em Restaurant Landschäftler) sinn scho lang verschwunde. Ebeso das monumentale Tramhüüsil links und die beschauliggi Rueh!

## **D Luftschnapperli hänn e Baiz am Erle-Fescht**

**(Langi Erle, Glaibasel)**

**Frittig bis Sunntig,  
26. – 28. Auguscht 2005**

### **Faasnachts-Termin:**

6. bis 8. Meerz 2006

Kemmet alli  
vorbyy!

Guetschhyyn uf dr  
folgende Sytte  
unde rächts  
usschnyyde und  
mitbringe.

### **E spezielle Dangg an**

D **Irma Wietlisbach** (s Mami vom Kurt),  
fyr dä grosszygigi Batze in d Clique-  
Kasse. Au anderi hänn e scheene  
Zuestupf gää: d **Müllers** vo Blätzbums,  
und dr **René Perren**.

**Urs Sommerhalder**. Är het uns  
kurzfrischtig e Handy-Cam für unseri  
Videoufnaame an dr Faasnacht kenne  
bsorge.

**Liselotte Sommerhalder**: Dange für  
das feine Zvieri am Wettstaipplatz am  
Mittwuch!

**Tobi Stocker**: Si Druckerei het uns  
Wyetikette nochedrugt.

Merci an d **Beatrice und Benno Kunz**!  
Die zwei hänn eimol mee dr Bummel-  
Apéro organisiert.

Dangg au an Brueder vom Marco, dr  
**Stefan**, fyr dr Parkplatz im  
Staineparking während dr Faasnacht  
fyr unser Requisit.

### **Mir gratuliere**

Em **Walti Schatzmann**. Är het am  
4.4.05 dr 70igscht Burtzeldaag kaa.

D **Beatrice Kunz** isch syt am 24.1.05  
65 Joor uf däre Wält.

Am 2.8.05 isch d **Melanie Schmid** 20  
Jöörli jung worde.

Und am 21.3.05 isch dr Däni  
Lioberschée (**Leu**) au ändlig 40ig  
worde.

**Intärni Jubiläum**: **Claudia** Eigenmann  
und **Claudia** Annen; beidi 20 Joor  
Luftschnapperli. 15 Joor sinn dr **Fix** und  
dr **Roger** drbyy und 10 Joor d **Sändi**.

*Sött an däre Stell öbber vergässe gange sii, mecht sich dr Schriiberling bi dääne Persoone  
entschuldige. Mängmool kemme halt nit alli Informazzione zue syne Oore.*



**Neue Perspektiven!**

[www.oekk.ch](http://www.oekk.ch)



Öffentliche Krankenkassen  
Schweiz

**Jung und unkompliziert.**